

瑜伽師地論本地分菩薩地真實義品講義二十七(2014)

一、像似正法〔瑜伽卷99〕p

云何名為像似正法？

謂略有二種像似正法。一、似教正法，二、似行正法。

若於非法生是法想，顯示非法以為是法，令他於中生正法想；如是法教，實故、諦故，非是正法，而復像似正法顯現，是故名為：似教正法。

若廣為他如是宣說，令他受學，亦自修行，妄起法想，習諸邪行，而自憍慢，稱言我能修是正行，應知是名：似行正法。

為廣宣說像似正法，復說中間嚧怛南曰：

初法等五種 次根等諸見 非處惡作等 後暴惡戒等

●法等五種

一、諸以如來所說法教相似文句，於諸經中安置偽經，於諸律中安置偽律，如是名為像似正法。

二、又由增益或損減見，增益虛事，損減實事。由此方便，於無常等種種義門，廣為他人宣說開示，如是如是自他習行，如是亦名像似正法。

三、又於宣說補特伽羅所有經典，邪取分別說有真實補特伽羅，如是亦名像似正法。

四、又於種種假有法中，宣說開示為實有性，如是亦名像似正法。

〔假有：一、聚集假有，二、因假有，三、果假有，四、所行假有，五分位假有，六、觀待假有，〕

五、又於遠離一切戲論究竟涅槃，分別為有、或為非有；說為有性、或非有性，如是亦名像似正法。

●根等諸見

一、又有一類補特伽羅，作如是說：世尊宣示稱揚讚歎密護根門，由是因緣寧不視色，乃至於法不以意思。而不繫念觀視眾色，乃至以意思惟諸法如是亦名像似正法。

二、又聞世尊宣示稱歎簡靜而住，便作是言：寧無咎責，不測量他。於應毀

者而不呵毀，於應讚者亦不稱讚，而不有所呵毀稱讚，如是亦名像似正法。

三、又聞世尊宣示稱歎和氣軟語，便作是言：受默然戒，都無言說，為極善哉。如是亦名像似正法。〔涅槃經：諸佛常軟語，為眾故說麤，麤語及軟語，皆歸第一義。〕

四、又聞世尊宣示稱歎節量衣食，便作是言：斷食而住，露體而行，最為妙善。如是亦名像似正法。

五、又聞世尊宣示稱歎離諠雜住，息諸言說及以事業，便作是言：棄捨臥具寂靜閑居，無所修習，為極美妙。如是亦名像似正法。

六、又聞佛說：心將導世間，心營造一切，隨心所生起，皆自在而轉。於如是等諸經義趣不如實知，或有一類由惡取執，作如是言：唯有一識馳流生死，無二無別。如是亦名像似正法。

七、又聞佛許持戒士夫補特伽羅，受百味食、百千衣服障道妙欲，設此品類正受用時，亦不為障。或有一類由惡取執，作如是言：世尊所說障道諸欲，若有習近，不足為障。如是亦名像似正法。

八、又聞佛說：諸阿羅漢於現法中，於食、言說、蘊、界、處等，不捨不取不如實知。便作是說：如我解佛所說法者，阿羅漢僧於其死後，無所覺了。如是亦名像似正法。

〔佛說：阿羅漢不順；不順：不如理虛妄分別。〕

九、復有一類，不如實知世俗、勝義二諦道理，違二諦理，作如是言：諸蘊無我？云何無我，造作諸業？令我觸證？應知亦名像似正法。

十、復有一類，本性愚癡，多行謗毀。彼於九種內正住心不如實知，於諦觀行、念住觀行不如實知。由不知故，為他宣說：唯信解作意是奢摩他品唯信解作意是毗鉢舍那品，唯信解作意能得究竟。自亦習行如是相行。當知亦名像似正法。〔九種心住：內住、等住、安住、近住、調順、寂靜、最極寂靜、專注一趣、等持。〕

●非處惡作等

- 一、復有一類，非處惡作，而不思惟。當知亦名像似正法。
- 二、復有一類，於其讀誦、觀行、作意皆有堪能，而樂僧事，亦於其中見勝功德，為他宣說。當知亦名像似正法。
- 三、復有一類，於戒、於修有所堪能，而於惠施見勝功德。遊歷諸方，於自禁戒所遮止處，多有毀犯，集諸財物奉佛法僧。當知亦名像似正法。
- 四、復有一類，於善說法、毗奈耶中既出家已，展轉相引，專以聽聞為其究竟。當知亦名像似正法。
- 五、復有一類，見諸苾芻大族大福，多獲衣等所有利養，捨少欲等而往其所恭敬敘慰、現親誨喻，令新苾芻邪心動作。當知亦名像似正法。
- 六、復有一類，棄捨如來所說甚深空性相應所有經典，專樂習學隨順世間文章呪術，而不自察懷聰明慢，又欲令他知己聰敏。當知亦名像似正法。

●暴惡戒等

- 一、復有一類，折伏暴惡及諸犯戒，為欲於彼暴惡犯戒作不饒益，發起惡思。當知亦名像似正法。
- 二、復有一類，搆集種種矯詐威儀。當知亦名像似正法。〔矯詐威儀：詐現諸根無掉、諸根無動、諸根寂靜。〕
- 三、復有一類，以解世間文章呪術，多求多獲所有利養。當知亦名像似正法。
- 四、復有一類，損惱於他，以其非法積聚財寶，作有罪福。當知亦名像似正法。
- 五、又即於彼能引無義像似正法，以諸因緣開示建立。當知亦名像似正法。如是一切像似正法，應知皆是違逆學法。